


«sablun» da Dumenic Andry

Il nouv cudesch da Dumenic Andry, la collecziun da poesias chi porta il titul «sablun», ho ün'aparentscha modesta, ma es fat cun grand'attenziun pels detagls. La cuverta dal cudesch ho la culur da sablun bletsch, i'l chantun suotwart a dretta as vezza quatter coquiglias e cun volver la cuverta as scuvrescha süllas prümas duos paginas il blovin dal mer chi ho purto las coquiglias a la riva da sablun. Avaunt cu river süllas paginas scrittas dal cudesch, ans vain già quinteda ün'istorgia, ans vegnan già preschantos lös, ogets e culuors chi sun scu ün fil cotschen illas 78 poesias da la collecziun: il sablun, la riva, il mer...

Il titul «sablun», uschè simpel ch'el pera, sviglia associaziuns ed aspettativas: Il sablun es ün materiel ambivalent: solid e lam, greiv e liger, süt e bletsch, prezius e sainza valur. Scu materia furnabla po el servir per creer ogets (chastels da sablun) u eir scu surfatscha per registrer stizis e segns (scu il fögl alv da palperi) – ma scu materia pulveriseda es tuot que chi'd es sablun adüna eir vaun e da cuorta düreda. Paraint culla puolvra u culla tschendra, sto il sablun eir per l'instabilité, l'inconstanza, il temp chi cuorra, la vita passagera e la mort. La lirica dal sablun es la lirica dals poets da la melanconia.

Pensains be a Paul Celan cun sia poesia «Keine Sandkunst mehr» e sia collecziun lirica «Der Sand aus den Urnen» ubain a Nelly Sachs cun suas poesias «Zeichen im Sand». Il sablun sto eir per la lavur da glimer pleds ed impissamaints, scu forsa tar Jorge Luis Borges e sia collecziun da novellas «El libro de arena» (il cudesch da sablun) u tar Italo Calvino e sia seria d'essays «Collezione di sabbia». Clà Riatsch ans renda attents in sia postfaczun al cudesch cha'l sablun saja ün materiel tuot oter cu nöbel ed exclusiv, ün materiel ümil ed ümid, ün materiel pover. Già il titul annunzcha te-

nor Riatsch il refüs – tipicamaing modern – da grandas fuormas e grands motivs poetics chi vegnan resentieus scu climbim retoric dals poets dal modernissem. Quistas poesias nu tscherchan ils grands elogis e la lingua patetica, ma partan pütost da piculezzas e banaliteds, da pitschnas observaziuns, da pleds e frasas dal minchadi per avrir ün spazi da reflecziun e d'interpretaziun fich vast e per rinvier a dumandas existenzielas da la vita umauna. Zieva ans avair musso in «Roba da tschel muond» sias qualiteds scu satiriker e parodist, in «Uondas» sieu talent per dumandas e reflecziuns filosoficas, as preschainta Dumenic Andry in «sablun» scu poet cun uraglias, ögls e cour avierts per las dumandas da nos esser, per nossas tscherchas d'identited(s), per las spraunzas, furtünas e fataliteds da nos destin terrester.



teis nom

teis nom
da sablun
a la riva dal mar
set leuas
lichan
il sal
da mia said

Quista poesia d'amur (disfurtü-neda) muossa bain cu cha que gratagia a Dumenic Andry in quista collezioni da poesias da partir dal sablun e dals elemaints associos (la riva, il mer, il sel chi tuocha tal mer e chi'd es puolvrà scu'l sablun) per descriver sentimaints ed impissamaints. Il nom dal «tü» es da sablun e perque passager, las uondas saledas dal mer al stützan. Il «eau» resta inavous sulet cun sia said. Sieu «sel da la terra», sieu tesor es gnieu licho davent. E cun tadler pü precis süls suns da la poesia as constata l'idilla dals «a»s illa prüma part («da sablun / a la riva dal mar») ed as oda las stillettedas e pizchedas dals «i»s ed il plaunt dal «ia» e dal «ai» illa seguonda part («lichan il sal / da mia said»). E cun tadler aucha megilder as scuvrescha dafatta las set laungias i'ls precis set «l»s da la poesia.

Il tun da basa melanconic vela eir per las diversas poesias chi discuorran da l'identited, dad identi-teds attribuidas, da l'esser indigen

u ester – illa societed, ma eir per se stess. L'interessant es cha in tuot la tragica da quistas cuortas sentenzas, as resainta precis cò la penna agüzza dal satiriker Dumenic Andry cha nus cugnuschains da sias prümas poesias e da sias glossas in gazzetta.

na chi

na chi
cha tü est
be
da chi
e tschai
faina no

La cumulaziun da «ch»s e la fuorma populera e grammatical-maing markeda «faina no» impè da «fain nus» suottastrichan il tun sech da quista poesia e tiran – güsta eir cun l'imitaziun da la lingua discurrida – vers la satira. Qualcosa simil vela eir per la poesia «ester» inua cha la repetiziun dal sun «sch-t» e la varianta popu-lara «chà» impè da «chasa» haun il listess effet – traunter melanco-

nic e satiric (sainza vulair dir cha la poesia saja ironica u na manageda sül seri – al cuntrari: il tun satiric suottastricha la disperaziun).

ester

ester est
ed ester
restast
sco fin qua
eir a chà

Quista pitschn'invista per dir e musser cha las nouvas poesias da Dumenic Andry in lur fuorma redütta e spessa ans daun bger da penser e da refletter – ma nu sun üna lectüra pesanta, dimpersè in lur simplicited, modestia e sinceri-ted üna lectüra zuond captivanta ed inspiranta.

zavranza

meis
es ün cour
da besch
nair
sainza nouda

toppharm
Apoteca Piz Ot

Poula & Gian Battista Camenisch
Eidg. Dipl. Apotheker ETH
7503 Samedan

081 851 23 23
www.pizot-apotheke.ch

Per lur postaziun da medicamaints e cosmetica:
mincha marculdi e venderdi furniziun a chesa da Bever fin Zernez